



**ЎЗБЕКИСТОН РЕСПУБЛИКАСИ НОМИДАН  
ҲАЛ ҚИЛУВ ҚАРОРИ**

**Зомин тумани**

**2022 йил 6 декабрь 4-1303-2201/2045-сонли иш**

Зомин туманлараро иқтисодий судининг судьяси Ш.Х.Бегматов раислигида, судья ёрдамчиси Н.Абдазов котиблигида, Ўзбекистон Савдо-саноат палатаси Жиззах вилоят ҳудудий бошқармасининг даъвогар “Жиззах ҳудудий электр тармоқлари корхонаси” акциядорлик жамияти манфаатида жавобгар “NODIRBEK VANOV OTA” фермер хўжалигидан 218 288 798 сўм электр энергиясидан бўлган қарздорликни ундириш тўғрисидаги даъво аризаси бўйича ишни даъвогар вакили С.Мустафоқулов (2022 йил 9 февралдаги 05/758-сонли ишончномага асосан) иштирокида, жавобгар вакили иштирокисиз, Зомин туманлараро иқтисодий суди маъмурий биносида бўлиб ўтган очик суд мажлиси муҳокамасида кўриб чиқиб, суд қуйидагиларни

**А Н И Қ Л А Д И:**

“Жиззах ҳудудий электр тармоқлари корхонаси” акциядорлик жамияти (кейинги ўринларда матнда Даъвогар деб юритилади) ҳамда “NODIRBEK VANOV OTA” фермер хўжалиги (кейинги ўринларда матнда Жавобгар деб юритилади) ўртасида 2022 йилда шартнома (Улгуржи “бюджет” истеъмолчиларга электр энергияси етказиб бериш юзасидан) тузилган. Ушбу шартноманинг 1.1-бандига кўра, ушбу шартномага мувофиқ даъвогар “Корхона” жавобгар “Истеъмолчи”га электр энергиясини уланган тармоқ орқали етказиб бериш ва “Истеъмолчи” истеъмол қилинган энергия учун ўз вақтида ҳақ тўлаш мажбуриятини олган.

Бироқ, жавобгар шартнома бўйича мажбуриятини лозим даражада бажармаган, яъни етказиб берилган электр энергияси учун тўловни амалга оширмаганлиги сабабли жавобгарнинг даъвогар олдида 218 288 798 сўм миқдорида қарздорлик юзага келган.

Натижада даъвогар манфаатида Ўзбекистон Савдо-саноат палатаси Жиззах вилоят ҳудудий бошқармаси судга даъво ариза билан мурожаат қилиб, жавобгардан 218 288 798 сўм қарз ундиришни ва Палата ишни ўзининг вакили иштирокисиз даъвогар вакили иштирокида сўраган.

Суд мажлисида иштирок этган даъвогар вакили даъво талабини қўллаб-қувватлаб, жавобгарга тегишли тартибда электр энергияси етказиб берилганлигини, етказиб берилган электр энергияси учун жавобгар тўловларни ўз вақтида амалга оширмаганлиги оқибатида қарздорлик юзага келганлигини маълум қилиб, судга 2022 йил 6 декабрь ҳолатига берилган қарздорлик



тўланмаганлиги ҳақидаги далолатномани тақдим қилиб, даъво аризани тўлиқ қаноатлантириб беришни сўради.

Суд мажлисининг вақти ва жойи тўғрисида тегишли тартибда хабардор қилинган жавобгар суд мажлисида иштирок этмади ёки вакили иштирокини таъминламади. Суд, Ўзбекистон Республикаси Иқтисодий процессуал кодексининг 127-129, 170-моддаларига асосан ишни унинг иштирокисиз кўришни лозим топди.

Суд ишдаги мавжуд ҳужжатларни ўрганиб, ишда иштирок этган даъвогар вакилининг кўрсатмаларини тинглаб, қуйидаги асосларга кўра, даъво аризасини тўлиқ қаноатлантиришни лозим деб ҳисоблайди.

Ўзбекистон Республикаси Вазирлар Маҳкамасининг 2018 йил 12 январдаги 22-сон қарори билан тасдиқланган “Электр энергиясидан фойдаланиш қоидалари” нинг 70-банди иккинчи хатбошисига кўра, маиший истеъмолчилар ҳар ойнинг 10-санасига қадар ўтган ойда истеъмол қилинган электр энергияси учун тўлиқ ҳисоб-китоб қилишлари шарт.

Ўзбекистон Республикаси Фуқаролик кодексининг 477-моддасига асосан, энергия таъминоти шартномаси бўйича мажбуриятлар бажарилмаган ёки лозим даражада бажарилмаган ҳолларда энергия билан таъминловчи ташкилот ёки абонент шу туфайли етказилган ҳақиқий зарарни қоплаши шарт.

Даъвогар тарафлар ўртасида тузилган шартнома бўйича мажбуриятини бажариб, жавобгарга электр энергияси етказиб берган. Етказиб берилган электр энергиясидан жавобгар фойдаланиб келган.

Бироқ, жавобгар шартнома бўйича мажбуриятини лозим даражада бажармаган, яъни етказиб берилган электр энергияси учун тўловни амалга оширмаган. Натижада жавобгарнинг даъвогар олдида 218 288 798 сўм миқдоридаги қарздорлик юзага келган. Ушбу ҳолатлар иш ҳужжатларидаги тарафлар ўртасидаги шартнома, солиштирма далолатнома ва бошқа ҳужжатларда ўз тасдиғини топган.

Ўзбекистон Республикаси Фуқаролик кодексининг 236-моддасига кўра, мажбуриятлар мажбурият шартларига ва қонун ҳужжатлари талабларига мувофиқ лозим даражада бажарилиши керак.

Шу боис суд, даъвогар вакили томонидан судга 2022 йил 6 декабрь ҳолатига тақдим қилинган далолатномага кўра, жавобгарнинг жами электр энергиясидан бўлган қарздорлиги 218 288 798 сўмни ташкил этиб, қарздорлик умуман тўланмаганлиги боис, суд даъвони тўлиқ қаноатлантиришни лозим топди.

Ўзбекистон Республикаси Иқтисодий процессуал кодексининг 118-моддаси биринчи қисмига кўра, суд харажатлари ишда иштирок этувчи шахсларнинг қаноатлантирилган даъво талаблари миқдorigа мутаносиб равишда уларнинг зиммасига юклатилади.

Баён қилинганларга кўра, суд даъво аризасини тўлиқ қаноатлантиришни, жавобгардан даъвогар фойдасига 218 288 798 сўм электр энергиясидан бўлган қарздорликни ундиришни, Ўзбекистон Республикаси Иқтисодий процессуал кодексининг 118-моддасига асосан суд харажатларини жавобгар зиммасига юклашни лозим топди.



Юқоридагиларга асосан ҳамда Ўзбекистон Республикаси Иқтисодий процессуал кодексининг 118, 127-129, 170, 176-180, 186-188-моддаларига амал қилиб, суд

## **Қ А Р О Р Қ И Л Д И :**

Даъво аризаси тўлиқ қаноатлантирилсин.

“NODIRBEK VANOV OTA” фермер хўжалигидан “Жиззах худудий электр тармоқлари корхонаси” акциядорлик жамияти фойдасига 218 288 798 сўм электр энергиясидан бўлган қарздорлик ва олдиндан тўланган 24 000 сўм суд почта харажатлари ундирилсин.

“NODIRBEK VANOV OTA” фермер хўжалигидан Республика бюджети ҳамда Суд ҳокимияти органларини ривожлантириш жамғармасига 4 365 775,96 сўм давлат божи ундирилсин.

Ҳал қилув қарори қабул қилинган пайтдан бир ой муддат ўтгач қонуний кучга киради.

Ҳал қилув қарори қонуний кучга киргач шу ҳақда ижро варақалари берилсин.

Ҳал қилув қароридан норози тараф бир ой муддат ичида шу суд орқали Жиззах вилоят судига апелляция тартибида шикоят (прокурор ишда иштирок этувчи шахснинг мурожаати бўлган тақдирда протест келтириш) қилишга ҳақли.

**Раислик этувчи, судья**

**Ш.Х.Бегматов**

